

Täkarđe ta iktäb Buləs i-käl-Kuləs

Äšqjəš

¹ A-wa näkk, Buləs, wa ija erhet n-Mässinäx änämmašul n-ŸisaÄlmasex. Ähuuläx-in näkk d-äñña-x däx-äddin wa s-isəm-net Timoti

² ayətma-näx wi n-iməššeddəjän n-imaxdalän däx-tassaxt d-Älmasex əzzäxnen axrəm wa n-Kuləs. Ikf'-iwän Abba-nänäx Mässinäx d-Emäli Ÿisa Älmasex ännuxmät-net d-älxer-net.

Tämeyit d-tittar n-Buləs

³ Wär käla hanäx-okäy ašäl d-wär nämmoy i-Mässinäx-i n-Abba n-Emäli-nänäx ŸisaÄlmasex däx-tittar ti has-nətäjj däx-təssəba-näwän.

⁴ Nətumay-as hak ašäl fäl-a-s, osän-anäx-dd isälan n-immun wa jəm s-Ÿisa Älmasex d-tärha ta n-tidət jəm i-iməššeddəjän.

⁵ A-wen, jəm-t ed təssanäm fäl ätṭäma wa käwän-äsjär Mässinäx-i ihän isənnawän. Ätṭäma-en, mäjräd wa n-tidət ämoos Älənžil a hawän-t-issəslän, tomänäm sär-s.

⁶ Älənžil daḡ wa s-käwän-in-əwwädän isälan-net, əmmək-wa-däx s-has-təsläm a-s titwəjjin isälan-net däx-äddunya iket-net, jarräwän äddinät tämudre ta täylälät däx-təssəba-net. Əmmək-wen-däx daḡ s-takkän isälan-en s-data xur-wän, xur-ašäl wa d-hasän-təsläm, təjrahäm

əddəttu wa ija ännuymät n-Mässinäx, əmmək-wen-däx dəx a-s təhhalän s-data dəx-ifäyyän n-äkall.

⁷ Älənžil wa s-təsläm, issäxr'-awän-t Ibbafra wa n-emärh-nänäx där-nohär əššäxəl, ənta i n-ämaydal ixdamän i-Älmasex dəx-idäggan-nänäx-hawän.

⁸ Ənta-en-däx a hanäx-ijän isälan n-tärha ta dd-iššənsär Unfas Šaddijän dəx-ulhawän-nawän.

⁹ Təssəba n-a-wen-däx a fäl näkkäneḍ-däx, xur-aşäl-i-däx d-hanäx-əjjäşän isälan-nawän-däx, wär käla nässunfa dəx-tamädilt n-Mässinäx-hawän, nətattär dəx-s ad-kawän-äkf musnät imdan n-erhet-net, äkf'-iwän dəx s-tärna n-Unfas Šaddijän sərho d-ujreh iket-net

¹⁰ i-ad-təlmədäm əmmək wa s-äniihäjja ad-sär-s təlkəmäm i-Emäli, təjrəzäm-as dəx-härät iket-net. Dihen, ad-təkrəşäm ännuḡ n-imärkedän iket-näsän, təhələm dəx s-data dəx-təməzzuyt n-Mässinäx,

¹¹ təşşuhum s-tärna n-älxurmät-net, tudabem tebäddé dəx-härät iket-net s-tazidert täddeewät d-tedäwit.

¹² Däwätät, tumayäm i-Abba-i käwän-ikfän turhajät n-ad-təjjəşäm ännur-net, tahərəm d-iməşşeddəjan təkasit ta hasän-itwär dəx-Təmmənəya-net.

¹³ Mässinäx, ohäx-anäx-dd dəx-tärna n-tihay n-Iblis, iwwäy-anäx s-Təmmənəya n-Rure-s wa ikna tärha.

¹⁴ Idəm n-Rure-s-en-däx a dəx-dd-nəjräw əlləllu dəx-tişəm n-Iblis d-tenäşše n-ibäkkaḡän.

Wär t-illa a-s wädden uf'e Ƴisa Ālmasex

¹⁵ Mässinäx, wär-itətəwənhij, a-wa ämoos iket-net, itawənhay dəx-ƳisaĀlmasex-i n-Rure-s-i t-illän härwa wär t-illa a t-illan.

¹⁶ Təssəba n-tärna-net ənta-en-dəx a dəx-dd-ixlāk Mässinäx härät iket-net, jer-a-wa ihän išənnawän wəla a-wa iwärän ākall, a-wa ilän mänhoy hakd a-wa t-wärän ila; imänokalän, imännähəḏän, iməşsuha, imärnan, wär t-illa a-s wädden ənta a t-dd-ixlākän, ənta dəx a-s dd-ixlāk.

¹⁷ Ənta a dd-əzzarän i-härät iket-net, ənta dəx a ittafän təmudre n-härät iket-net.

¹⁸ Ənta a-s eḡäf n-taxəssa ta təmoos älkänisät, ənta a issənsän itabbän n-əddunya, ənta a dd-əzzarän tanākra jer-inəmmuttan i-ad-wär-itoləs tamättant, umas əmizär dəx-härät iket-net.

¹⁹ Fäl-a-s, ijrəz i-Mässinäx, ad-izzəx s-a-wa ämoos iket-net dəx-Rure-s Ƴisa.

²⁰ Ənta a dd-ija Mässinäx əssəbab i-ad-izəmməzəl d-iman-net a-wa t-illän iket-net, jer-a-wa izzəxän išənnawän wəla a-wa izzəxän ākall; ašni n-Ƴisa wa inḡälän a-s ətwəşlāb fäll-tajəttewt a-s əssəbab n-älxer jer-Mässinäx d-dəgg-adəm-i dd-ixlāk.

²¹ Kəwəned dəx i s-ibda, jan-kəwän erk inəzjam-nəwän d-erk imojjan-nəwän, iməjarän d-išənja n-Mässinäx,

²² əzməzəl-kəwän Mässinäx əməra-dəx d-iman-net s-tamättant ta ija Rure-s a-s dd-ämoos ägg-adəm fäll-əreri n-ākall. A-wen, ij'-e dəx-təssəba n-ad-tudabem tebädde data-s šəddijəm,

wär kăwăn-iwer älχib wäl' iyyăn, wär t-illa daχ uđlem kăwăn-iwarăn.

²³ A-wen, ad-itbət afäl wär dd-tärzem dăχ-immun-năwăn, təknəm antum dăχ-s i-ad-wär kăwăn-ăsnamăjjäj härät wäl' iyyăn d-ättăma wa kăwăn-ăsjarăn isălan n-Ălənžil wi s-təslăm; isălan-en-hi, wär t-illa ere s-wădden, isl'-asăn. Năkk daχ, Buləs, ij'-ahi Măssinăχ âmaway n-isălan n-Ălənžil.

Ălyizabăt wa ihannăy Buləs d-tăbbillănt ta ija i-ad-tăkk ălkănisăt s-data

²⁴ Ayətma-χ, âmăra-dăχ, əsidăwăt-ahi a-wa hannăyăχ dăχ-tersəmmawen fälla-wăn ed olăh sār-i d-a-s năkk -i-dăχ a hin-isimdun ălyizabăt wa hin-ođăn Ălmaseχ; ărđeχ s-ahănay n-ăχana-wen-dăχ dăχ-təssəba n-ălkănisăt-i tămoosăt tayəssa n-Ălmaseχ.

²⁵ Ălkănisăt-en-dăχ a-s âmooosăχ ănaxdim ed, ikkəllăf-ahi Măssinăχ dăχ-turhajăt-net d-ad-kăwăn-săχrăχ s-ujreh măjrăd-net iket-net,

²⁶ səlmədăχ-kăwăn s-əddăraj wa s-kăla ättunkăl iwətyan fäll-iwətyan i-ăddunya iket-dăχ-net măšan, ašăl-i-dăχ, əsnăfalăl-t-dd Măssinăχ i-iməššeddəjăn-net

²⁷ wi əsnăfrăn i-ad-tăn-isəlməd s-təmyäre n-ărrəzăχ, d-ălxurmăt n-a-wa s-kăla t-iffăr i-tiwsaten iket-dăχ-năsnăt. Əddăraj-en-hi s-ašăl-i-dăχ ănfalăl-dd, ălmăχna-net da: Ălmaseχ dăχ-uhawăn-năwăn, a-di, təjjăšăm təmyäre n-ănnur n-Măssinăχ.

²⁸ Ălmaseχ-en-dăχ a-s nəxaţţăb isălan-net, nətakkăs hak ägg-adəm dăχ-tayđărt, nəsaχra

hak ägg-adəm s-särho ilan ujreh i-ad-dd-nəsəbdəd hak ägg-adəm iḡrad, imda dāḡ-tassaḡt-net d-Älmasex.

²⁹ Təssəba n-a-wen-dāḡ a fäl ədgaḡāḡ dāḡ-älxidmät wa heḡ, äbbiillänāḡ s-tärna ta hi-ikfa Älmasex ed tärna-net a fäl äsifällāḡ dāḡ-a-wa heḡ iket-net.

2

¹ Ayətma-ḡ, ärheḡ ad-təssanäm fäll-eḡāwe wa ija amjār wa heḡ fälla-wän, kāwāneḡ d-käl-Lāwdisa, d-äddinät wi iyyäḡnen s-wär kāla ənhäyän idəm-in.

² A-wa heḡ, heḡ-t fälla-sän əntäneḡ-dāḡ i-ad-ismaḡän ulhawän-näsän, tasāḡäm dāḡ-tärha s-iyyän n-ənniyät, ənnufləyän dāḡ-ärrezāḡ n-ännuḡmät n-Mässināḡ, äkf'-en musnät imdan i-ad-udaben ujreh n-əddäraj n-Mässināḡ wa s-kāla ättunkäl s-ašäl-i-dāḡ änfaläl-dd älmāḡna-net; a-wen a t-ämoosän Älmasex.

³ Ənta-en-dāḡ a ḡur-dd-imdä ärrezāḡ wa n-särho hakt-dāḡ tayətte.

Hewät fälšäfa ta n-bahu

⁴ A-wa, janneḡ-awän-t i-ad-wär kāwän-isəswid äwadəm wäl' iyyän s-täḡude n-iləs

⁵ fäl-a-s, kud-kāwän-ujəjäḡ dāḡ-taḡəssa-nin-dāḡ, ärtayāḡ dār-wän s-ənniyät-in ed tartit ta tāhuusket jəm jer-iman-nāwän d-antum wa ija immun-nāwän dāḡ-tassaḡt d-Älmasex, ij'-ahi asəddəwi wa fäl sär-i, šund ḡas, əlleḡ-t ḡur-wän, hannäyāḡ-kāwän.

Tihusay n-tämudre ta ikarräš äwadəm ir-tayän d-ÿisa Älmasex

⁶ Ämära, ayətma-ğ, šämad tidət-däğ a-s tärđam s-Emäli ÿisaÄlmasex, adiš, äjät-as alkum itbatän.

⁷ Äjet alkum-näwän-has antum wa täjjän ikewän n-ahəšk däğ-äkall, umaset asəğär wa tøjräwäm a äsišahen immun-näwän däğ-a-s täsidäwäm a-wen härkuk d-tämayit.

⁸ Agəzät iman-näwän, wär käwän-isäswadet äwadəm wäl' iyyän s-tiddas n-fälšäfa dd-ikkas däğ-eğäf-net wäla s-bahutän äsihätälnen fäll-agna dd-əknan dägg-adəm i-iman-näsän, wäla s-a-wa fäll-təgl' äddunya, a-s ija a-wen, wär t-illa a osay a-wen d-Älmasex.

⁹ Wär hasän-täsjädäm. Mässinäğ, a-wa ämoos, äsbayän-anäğ-t-dd iket-net däğ-ÿisa Älmasex.

¹⁰ A-wen-däğ a fäl, a hin-tođänäm-däğ, ill'-awän-t çur-Älmasex-i äminakälän fäll-iməşsuha d-imärnan iket-däğ-näsän.

¹¹ Enta-en-däğ a çur-tøjräwäm amili äynayän wärän oleh d-wa täjjän ifassän n-dägg-adəm, ed amili wa s-Älmasex iman-net a t-itajjän i-inəttulab-net, älmäğna-net a-s, ad-tøjrewäm tärna fäll-abäkkad, təkrošäm ašäl fäll-erk imojjan-näwän.

¹² Käwäneđ day i omänneren s-tärna n-Mässinäğ ta dd-təssənkärät ÿisa jer-inəmmuttan, əlmədät a-s atwəsəlmay wa tätwäjäm däğ-aman, älmäğna-net a-s tohäräm dār-s tamättant. Azənjəz day wa dd-jäm

darät alämaḡ-nāwän däḡ-aman, älmäḡna-net a-s tohäräm d-Älmaseḡ tanäkra ta dd-ija jer-inəmmuttan i-ad-där-s tärtöyäm.

13 Kāwāned-i s-ibda jan-kāwän erk ijitän-nāwän šund inəmmuttan dat-Mässināḡ, äsisalähän-kāwän d-inəzzulam† wären ämeläy; ašäl-i-däḡ, däḡ-idəm n-Älmaseḡ, issenkär-kāwän-dd Mässināḡ däḡ-tamättant, ikf'-iwän tämudre täynayät; inš'-anāḡ näkkäneḡ hagd kāwāneḡ ibäkkadän-nänāḡ.

14 Älkaḡ wa itwārän s-ənta a fäl əktabän uḡlemän-nänāḡ däḡ-isälan n-anməšri-nänāḡ i-färəḡän d-alämär n-Mässināḡ, omäs-t-in Ḳisa, ikkäs-t-in s-iyyət s-tärna n-atwəşləb wa ätwäjjä fäll-tajəttewt.

15 Äzzāman wa d-ämmut Ḳisa fäll-tajəttewt, ikräš tärna fäll-iməşsuha d-imärnan, ikšäf-tän dat-tiṭṭawen n-äddunya iket-net, ija iḡunan däḡ-errawän-näsän, iwät-tän data-s.

Täbəddawt d-a-wa fäll-təgl' äddunya

16 A-wen-däḡ a fäl wär kāwän-isäwaret äwadəm wäl' iyyän uḡlem däḡ-isälan n-a-wa tättäm wäla a-wa sässäm; däḡ-isälan n-ašäl n-ämudd s-wär təlkeäm, wäla däḡ-iba n-uḡəf n-tebädde n-orän; wäla däḡ-isälan n-ašäl n-əssəbət-i n-täsonfat s-wär təlkeäm.

† 2:13 2:13 — Ḳur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-däḡ, änəzzalim, äkafär (ere wärän issen s-Mässināḡ).

17 Härätan-win-däx iket-däx-näsän, taliwen n-a dd-imalän a ämoosän. Ämära tidət ənta tosä-dd, a tät-ämoosän, Älmasex.

18 Wār toyyem äwadəm wäl' iyyän isiləbbuđän tayəssa-net, älmät əmmək-wen-däx a-s isaras iman-net dat-Mässinäx, wäla i iyabbädän ənjälosän, ija däx-wän tasäja fäl-a-s innin itajj a wār təjjəm. Äddinät wi işilləw a-wen, sakafän iman-näsän, jannen s-bahu a-s a-wa tän-işlän, Mässinäx a hasän-t-dd-äsnäfalälän däx-täharjit, wār hasän-täsjadäm fäl-a-s inəzjam-näsän, wār-əglen ar fäll-a-wa fäll-təgl' äddunya.

19 Äddinät-en, wār-änmättafän d-Älmasex-i ämoosän eyäf-wa ihakkän tayəssa a-wa s-tämiyatär, ənta-en-däx a-s əssəbab n-tassaxt ta t-təllät jer-izəmmuz d-azarän, isadwal-tät Mässinäx s-əmmək wa s-irha.

20 Şamad ämära, toharäm d-Älmasex tamättant däx-isälän n-a-wa fäll-təgl' äddunya, mafäl təyyəm dägg-adəm sawarän-käwän färəđän wi təggarnen äddinät əglanan fäll-a-wa fäll-təgl' äddunya?

21 Jannen-awän: «He käwäneđ, wār təđkeläm härät wa, i läbasän; wār täkräbbem härät-wədi, ixäramän; wār dəsam härät-wen, wār-oley»,

22 jannen a-wen-däx a-s ija a-wen härätän-win-däx iket-däx-näsän, wädden wäla a əndärrän ed wār t-illa a ənfän afäl işwār ikş'-en äwadəm. Darät-a-wen dəx, färəđän-win-däx, wār-ämoosän xas ar a saxren dägg-adəm, wädden Mässinäx a dd-falän.

23 Äduuttät a-s färəđän-ənnin-däx, änifäqqän d-a isawađän sārho fäll-əgg-adəm,

ässiiiktän-dd älyibadät dd-ifalän ulh d-asiinən n-taxəssa d-tanhađt dāx-s məšan, wār t-illa a-s ənfan ägg-adəm irhan ad-ikrəš tärna fäll-erk derhanän wi ännihäđnen dāx-taxəssa-net.

3

Tämudre ta täynayät tatäjrawät dāx-Ÿisa Älmasex

¹ Šämad tidət-dāx a-s toharäm d-Älmasex tanäkra ta dd-ija jer-inəmmuttan, adiš, əmmäxät i-a-wa hawän-itwār Mässinäx dāx-išənnawän-i dāx-äqqiima Älmasex, ämiinakäl daw-ayil n-Mässinäx,

² äxləbnet-käwän härätän-win-dāx hänen išənnawän, təyyəm fälla-wän azənnuzjəm dāx-wi n-äddunya.

³ Käwäneđ, ɣur-ašäl wa d-tomänäm s-Ÿisa Älmasex, tämoosäm šund äddinät ämmuutnen dāx-isälän n-a-wa fäll-təgl' äddunya, tämudre ta täynayät təjräwäm, toohar d-ta n-Älmasex atunkəl ɣur-Mässinäx.

⁴ A-wen-dāx a fäl ašäl wa dd-mad-infiləl Älmasex-i ämoosän tämudre-näwän, ad-där-s dd-təmzəyyim anfiləl dāx-älxurmät-net.

⁵ Təssəba n-a-wen-dāx a fäl dāx-wän ärheɣ ad-təbđəwäm d-erk imojjan-näwän iket-dāx-näsän, əbđəwät d-a-wa isaməđasän tiɣəswen-näwän d-iba n-təšədje d-derhan dərɣalän d-derhan äsisakäyän, tärha n-härät-i wärät təzley d-älɣibadät n-äššanämän.

⁶ Təssəba n-härätän-win-däx a fäl dd-izizəbbut Məssinəx əşşar-net [fäll-əddinät wi has-äniməşräynen].

⁷ Härätän-win-däx a-s käla tän-tamaşaläm kəwəneç-däx a-s təttafäm təmudre-ten-däx

⁸ məšan, əməra, əbdəwät dər-sən iket-däx-nəsən, wər tän-tolesəm amişəl. Äyyät fälla-wän adkär d-tukəse n-ulh d-tälläbäst d-tizmiten, wər səfəlçayät,

⁹ wər tinmənnit bahu jer-iman-nəwän kəwəneç-i əbdänen d-tasna-nəwän ta-däx ännihäç abäkkäç d-timaşalen-net,

¹⁰ ed əməra, təlsəm tasna ta täynayät-i s-Məssinəx-i n-Əmaxlak-nənəx a hawän-tät-ikfän, isaynay-tät dəx härkuk dəx-təssəba n-ad-t-təknəm muzəyät, taləhəm dər-s.

¹¹ Dəx-tasna ta-hi täynayät, wər-izley wa n-Älyunan d-wa n-əgg-Älyähud; wər-izley wa əmeläyän d-wa wərän əmeläy; wər-izley wa n-ənəzzalim d-wa n-älzahil; wər-izley eläll d-akli, əbas t-illa ar Älmasex, ənta a-s härät dəx-härät iket-net.

Çaymät tinmədhiläm jer-iman-nəwän

¹² Şəmad əddinät əsinəfrän Məssinəx a təmoosəm, ij'-iwän iməşşeddəjän s-tətbat tərha ta hawän-ija, adiş, nəməddənät təhanint kəwəneç-däx jer-iman-nəwän, tənmədhələm jer-iman-nəwän, isərəset hak iyyän iman-net dat-amidi-net, izadät jer-iman-nəwän, tənmezəzzəydäräm,

13 tənməşmāräm, tənmenšəm jer-iman-nāwän; ere s-iḡšād aṅṅa-s härät-däḡ, änšet-as-in s-əmmək wa s-hawän-inša Emäli.

14 Äjät jənnəj-a-wen-däḡ iket-net anmärh imdan jere-wän ed ənta a dd-itiirəwən tartit təmdat.

15 Äyyät älḡafyät wa ihäkk Älmasex ad-ännähäd däḡ-ulhawän-nāwän ed ənta a kəwän-dd-iḡrən s-älḡafyät-wen-däḡ, issärtäy-kəwän i-ad-tumasäm tiyyät taḡəssa, tumayät i-Mässinäḡ.

16 Ijatet mäjräd wa n-Älmasex jere-wän s-särho, tənməkəfəm tayətə, tənməkəkəsäm däḡ-taydärt s-särho imdan, tamələm Mässinäḡ s-ulhawän əmdanen, tumayäm-as s-təmmalen dd-əzjarnen əlkəttab wa n-Äzzäbur d-təmmalen janen fäll-tuksəda n-Mässinäḡ d-isuhay dd-oraw sār-wän Unfas Šəddijän i-ad-sār-sän tamələm Mässinäḡ.

17 A jännem d-a tadjäm-däḡ, äjät-t däḡ-derhan n-ad-səməḡäräm isəm n-Emäli Ȳisa däḡ-a-s tumayäm i-Abba Mässinäḡ däḡ-təssəba n-isəm wa n-Ȳisa.

Ejadäš wa n-älməssexitän

18 Tidəden! Särəsmät iman-näkmät dat-meddən-näkmät s-a-wa änihäjjän ed a-wen-däḡ a ijrazän i-Emäli.

19 Meddən! Ärhet hak iyyän däḡ-wän hənne-s, wär təssəsmämäm fälla-snät.

20 Aratän! Səjdät i-imärəwän-nāwän däḡ-härät iket-net ed a-wen-däḡ a ijrazän i-Emäli.

²¹ Abbatän! Wär täzzäkänzäräm aratän-näwän i-ad-wär fälla-wän wär-änxesän iman-näsän.

²² Eklan! Säjdät i-wi käwän-länen dāḡ-äddunya-ta-dāḡ dāḡ-härät iket-net, wädden dihad käwän-hannäyän ḡas dāḡ-ittus n-ad-käwän-aməlän, änn-ak, jer-hannäyän-käwän wäla, äknät eššäḡəl-näwän s-ulh ijlayän dāḡ-tuksəḡa n-Emäli.

²³ Eššäḡəl häm-dāḡ, äjät-t s-ənniyät imdan šund Emäli a-s täxdamäm wädden dāḡg-adəm,

²⁴ älhäk wa s-ilkam ad-t-təjrəwäm, itwarawän-t Emäli dāḡ-išənnawän. Älmasex a-s Emäli, umasät eklan-net

²⁵ fäl-a-s, ere iḡdärän dāḡ-a-wa iha, ilkam dāḡ-s ad-ijrəw älxaqq n-taydärt-net ed Mässinäḡ ya, wär-iḡley äddinät.

4

¹ Məssaw-s n-eklan! Äjät i-eklan-näwän a-wa oläḡän d-a-wa oḡädän dāḡ-a-s təssanäm a-s käwäneḡ-dāḡ, lam Mässi-wän, iha älžännät, dāḡ-išənnawän.

Infəšet Älənžil fäll-ärori n-äkall

² Təddalät Mässinäḡ härkuk, eḡləyät hullan dāḡ-a-wen, äkfät Mässinäḡ semḡar, tumayäm-as.

³ Təddalät-anäḡ-in näkkäneḡ-dāḡ i-ad-hanäḡ-ijrəw Mässinäḡ tašləlt s-näxṭäb i-äddinät isälan n-Älənžil, nəsefhəm-tän eḡdäräj n-Älmasex wa hasän-ättunkälän s-ašäl-i-dāḡ, änfaläl-dd älmäḡna-net ed dāḡ-təssəba n-iji n-isälan-en-dāḡ a fäl heḡ tišəm.

4 Tëddalät-ah'-in Mässinäḡ i-ad-xaṭṭäbäḡ isälan-en-däḡ s-əmmək iknan asəjrah ed a-wen-däḡ a hi-iwarän.

5 Iwäret-kāwän sārho jer-äddinät wi n-ajäma wären əzzey ḲisaÄlmasex, tašlolt təjrawäm-däḡ, äjät-asän isälan-net; təyyəm fälla-wän a-wa wär-iha älfäyda.

6 E-d tažäwwabäm i-äddinät däḡ-isälan n-Ḳisa Älmasex, äjät-asän mäjräd äzedän, ilan temde, təlmödäm daḡ a-wa jännem i-häk äwadəm.

Tihulawen d-ajilal n-mäjräd

7 Däḡ-a-wa hi-dd-iqqälän näkk, isälan-nin, ad-däḡ-wän tän-äj äñḡa-ḡ wa əkneḡ tärha Tušik. Nohar näkk hagd ənta älxidmät wa hanäḡ-issäḡläf Emäli, äjjəyhäḡ a-s iḡdal däḡ-a-wa itäj iket-net.

8 Näkk iman-in a hawän-t-in-ässokän i-ad-hawän-äj isälan-nänäḡ, isəsmäḡ ulhawän-näwän.

9 Äsiidäwäḡ-t-in d-Unažəm wa n-älkänisät-näwän, äñḡa-ḡ n-ämaydal əkneḡ tärha a ämoos ənta-däḡ. A däḡ-wän əjən isälan n-a-wa ijan diha-däḡ iket-net.

10 Ähuul-kāwän-in amidi-nin Aristarəḡ-i dār-oharäḡ takärmüt, ähuul-kāwän-in daḡ Marḡəs wa n-ara n-meddən n-Bärnäbbas. Ənta-en-däḡ a-s äru d-kāwän-äsmätäräḡ dār-s, a-s hawän-ənnəḡ, afäl kāwän-in-osa, səbbəlölät-t.

11 Ähuul-kāwän-in Ḳisa wa itawäḡren s-isəm Istus. Meddən-wi-däḡ n-käraḡ ḡas däḡ-dägg-Älyähud wi n-älmässexitän, a hi-ədhälnen a ija a-wa-däḡ däḡ-älxidmät wa heḡ i-ad-tətbət

Təmmənəya n-Mässinäx; ijmaḍ-t äššäk a-s əknän asəmaḍ n-ulh-in.

¹² Ähuul-käwän-in Ibbafra wa n-änaxdim n-Älmasex, ənta-däx, i n-älkänisät tədi-däx-näwän. Itajäynan härkuk dat-Mässinäx i-ad-təbdadäm däx-immun, wär t-illa älyib käwän-iwarän i-ad-təlmədäm erhet n-Mässinäx iket-net.

¹³ Äjjəyhäx i-əddəgozät wa ija däx-təssəbanäwän käwənəḍ d-käl-Läwdisa d-käl-İrabolis.

¹⁴ Ähuul-käwän-in Luqa wa n-läxtur nəkna tärha, ähuul-käwän-in daḡ Dimas.

¹⁵ Tähuuläm-anäx-in ayətma-näx wi hänen aḡrəm wa n-Läwdisa, tähuuläm-in daḡ Ninfa d-älkänisät ta tažammaḡät däx-ehän-net.

¹⁶ Afäl ḡur-wän tätwäḡra təkarḍe-ta-däx, äjät əmmək fäl tätwäḡra daḡ däx-älkänisät ta n-käl-Läwdisa, täḡrəm daḡ ta tän-dd-madät-təfəl sār-wän.

¹⁷ Ännät-ahi i-Aršibb, ənneḡ-as: «Hekäyy! Äj ənniyät i-ämašal wa käy-issäḡläf Emäli, aḡəd däḡ-s.»

¹⁸ Edägg-wa-däx däḡ-təkarḍe-ta-däx, näkk iman-in Buləs a t-iktäbän s-äfuss-in: «Näkk, Buləs, ähuuläx-käwän-in.» Kittəwät-dd a-s näkk ya, takärmüt a heḡ.

Issənsä fälla-wän Mässinäx ännuḡmät-net. Amin!

**Ălənžil n-Ÿisa Ălmasex: Kitab Ălmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

b95f369b-a236-5ca8-8cab-11f74279d73c